

摘藻堂四庫全書薈要

集部

欽定四庫全書薈要

集部

秋澗集卷四十七



詳校官助教臣謝登雋

欽定四庫全書薈要卷一萬六千一百三

集部

秋澗集卷四十七

元 王惲 撰

行狀

故真定五路萬戶府叅議兼領衛州事王公

行狀

昔王延州有云君子有惠政而無異政史臣傳循吏而無能吏故班孟堅叙龔黃鄭召諸人曰生有榮號死見奉祀廩廩德讓君子之遺風矣德既肆

乎循政復極乎惠求之今人其惟王衛州乎公諱  
昌齡字顯之姓王氏滄州人世雄于財以孝義著  
稱鄉里公少穎悟不凡業儒學嶄然見頭角故大  
父臨終嘆曰王氏之宗善積有素嗣續弗絕必矣  
然大起吾門者必在此子也貞祐初滄景被兵破  
公以孤童子能依彊濟難間行歸汴抱負奇節而  
時人未之知也正大末京城戒嚴北面元帥府以  
材幹辟公授帥府經歷官積勞遷明威將軍陳州

防禦判官適書大丞相政總兵民撫鎮河朔開幕  
府舉良能恢弘父兄之業用薦者起公叅議幕府  
事公遂悉心畢力知無不為故得感同風雲合若  
符契國朝有事東南城攻野戰餘二十年公籌畫  
戎幄應變機權無戰無之以至冒矢石輸忠力作  
士氣雖一時輔佐有不克負荷者初王師次安陸  
負險之民盤結山谷間備禦完固難於力取公慨  
然以招諭降集請行時人危之既抵壁宣示恩信

喻以禍福竟以招降而全活之歲丙申冬天兵次光州其時餉道不繼主帥因命公率十餘人乘筏入焦湖督運中流遇賊甚劇衆怖亂筏傾身沒於水者半公獨神色益壯持兵殊死戰賊潰護所運以濟軍士賴之大振遂取光州凱還丞相嘉公伐謀制勝之略遂留公居守公遂附安反側市肆不易安堵如故幾於一載及策勲盟府主帥累陳公之績以聞朝廷褒寵之而後奉命北覲通名于天

朝者數矣每以生民休戚軍國利病為已任西風沍寒  
往返之勞畧不之卹也于今良法善政守而不失者多  
公所請云辛亥秋七月先皇帝即位正封邑錫勲舊復  
以汲胙共獲新中山陽六縣之地封戶書大丞相若古  
采地然昭其功也時朝廷以汴洛荆徐畀丞相經畧之  
以衛乏人為憂且曰衛當四達之衝民疲事劇非得二  
千石循良者無以劇夷積弊涵養瘡痍也既難其人特  
命公領其事公下車以來敬以奉上恭以執事巨細不

遺知所後先哀民之困於繭絲也均徭平賦以蓄其力  
痛政之極於污染也治官汰吏以清其源并容細民不  
擾市肆懋遷有無以通舟車隄防以捍水災課農桑  
以抑游手尊王人則修飾官舍免病涉則平治橋梁勵  
薄俗扶善良禮賢俊贍貧乏行郭郭廣居廛通商惠工  
興滯補弊民不見吏而無吠警之虞士格所恥咸有聞  
知之懼蓋公之治化謹身帥先居以廉平不至嚴而已  
衛自亂餘以來民耕植居郡東者多而泉水自鄆城而



下崖岸平流駛如掌上稍東復與淇水合秋潦時至涇  
流之大南際漢金堤田廬為之一空公為隄黑蕩陂以  
禦之遂絕橫決之患清水出山陽白鹿嵬公乃度原隰  
創溝澮溉田餘數百頃其興起水利如此朝歌介邱鄘  
之間地迫山麓灌莽極目盜闖出沒越人於貨行者苦  
之公乃建議于漕臺周侯德甫州而縣之驛亭平襄南  
棲頃丘於是淵藪之患息駟騎之力紓焉而德之波及  
鄰土者又如此既而丞相材公之為酬公之功以其子

復充同知衛州節度使事遂有撫卹軍民均平差役勸課農桑裁決詞訟治効極多之譽誠以八年之間熙然而春郁乎其文樂國多士之風還舊觀矣己亥春例上計行臺惟怯苛猛公不忍甫息之民橫被侵暴遂乃道巴峽抵忠渝哀鳴相府中有以彌綸之也雖獲所請竟以憂勞致疾東歸以是年十月二十日卒于號縣之斜坡里春秋六十有三越十一月葬于汲縣王尚村之西原送喪者餘萬人攀號祖奠凝慕不已其貴官名士若

庫庫左丞姚司農張左轄參卿王仲禮宣撫張子敬者  
德孫元輔段季昌咸遠道而致祭衛人思之如戴父母  
明年相與起祠宇立遺像植豐碑壽遺愛歲時香火之  
奉其嚴如生公姿明良安雅德量無涯涘風鑒表表口  
不出臧否飭吏以儒外彪中弼慈祥豈弟喜愠不形于  
色務明大體恂恂無華持論深長操守匪石其待人御  
物純以至誠感發人心諄諄訓導若嚴師慈父有銘骨  
不能忘者初京城被圍友人某以罪逮捕抵公為舍匿

之竟以獲免焉制徒單雲甫肥遯鄰邑聞公之典衛也  
幡然來歸為治堂黌極賓禮選子弟之開敏者從而師  
之自是郡之文風尤為熠興又曹取齋通甫由趙來依  
疽發背自病至終公暨拯殯送曲盡友義北渡後元遺  
山號稱一代士林之宗愛慕高義乃有今而後寒士知  
所歸之嘆每自公退食盤饌稍盛必撤去之曰無暴殄  
天物及宴樂賓客供具豐腆盡於殷厚曰儉于人則不  
可也餘暇則閱書史接文士晚年尤喜作詩歌詠風流

不知老之將至至雄章傑句間見層出兼善尺牘行書  
嘗謂下客王惲曰吾少業儒以時艱罔卒所志然胸中  
緒餘之氣勃勃然日新矣其好學又如此愛其子擇師  
而教之因訓之曰我不願若富貴能儒素起家敝廬饘  
粥生養死葬足矣故于諸生獎藉作成爲尤至所交皆  
天下豪傑其推賢讓能而升諸公者如中山楊西庵盧  
龍廬叔賢河南鄭子周陽夏董端卿皆一時材大夫也  
公之歿丞相墓祭而哭之曰昔公勤勞我家三十餘年

事無巨細咸仰決焉豈其天奪之速而至於斯俾予玃  
玃然在疚至有失目折肱之喻哀號之聲感動左右其  
為賢主人所惜如此不可謂不遇也不可謂不達也故  
論者評公之惠愛類鄭子產忠貞類漢王常智周事悉  
類蘇令綽權闕望雅闕

事闕

之

其樂於為善之心又如饑渴之于飲食也苟推而行之

天下其功烈豈止是哉夫人姓陳氏齋闕安人生子男

一人諱復少負鑒裁闕於間母通達政體用丞相廷薦

宣授衛輝路同總管事其綸章諭之曰故叅議王顯之

才行相輔政恕中行俾洽衛輝民安事辦今子復良有

父風以繼述之事考之誠無愧負矣孫二人曰雪山曰

鐵山女孫一人曰幼安嗚呼公生平事業智名勇功囊

括無迹恐蕪類之辭不足發越盛德之萬一敢以區區

聞見播在興頌之實者勉為具述託立言君子而圖其

不朽焉中統三年秋九月二十有九日門下王某謹狀

太一二代度師贈嗣教重明真人蕭公行狀

師諱道熙字光遠本姓韓氏其先汴州人五代祖銀青

榮祿大夫壽自唐季來隸于衛曾祖奕山舉茂材祖渤

進士第父矩隱德不仕度師其仲子也師為人英偉晬

目疎秀豐下美鬚髯三歲識字六歲能書棲心教法儼

然注蕭門二葉之望金正隆間始祖一悟真人以神道

設教上動人主所在翕然從風韓氏舉族清修師母閭

尤極信心深入法海既孕苦病父請禱于真人真人曰

汝韓氏素植善根當產異人且昭陽報然將來必佐吾



法門可服吾丹書以安胎息久之母感異夢既寤師生  
果稟奇相充閭之氣肅如也纔免懷留養道宮受度為  
道士復先訓也再命而受清虛大德之號大定六年冬  
十有一月真人羽化於萬壽文室師練經哀感如喪考  
妣於是相宅兆具葬儀及殯整整有法綱而不紊觀者  
咸嗟異之時師甫滿十祀耳既窆師乃陳寶籙法物具  
香火陞堂以二代嗣事諭衆有門弟子辛道省劉道固  
等思有以大厭衆心稽首求頌且問師它生云何賢聖

師即走筆批曰明月清風大德頗訝愚人未識忉忉詢  
吾為誰只是從來太一衆遂龍服歸心焉九年朝廷歆  
其行異勅立萬壽額碑於本觀是後聲教大振門徒增  
盛東漸于海矣初真人謂靈章寶籙率天神持護遺命  
起臺中央上為壇屋鐵作戶牖庶幾神靈游居有以安  
安之師乃擴充尊訓尊光圖籙締構層閣制極壯麗揭  
以靈章寶蘊之名歲時醮祭為衆生進階之地復建朝  
元觀為祖師墳原道場仍植豐碑表裸景行不數寒暑

內外修治輪奐中度師直以德教感化曾聲色不動門人子來如趨父事十一年時師始十有四臘門人鉅鹿李悟真者造請何為仙道師曰做仙佛不難只依一弱字便是耳曰弱者道之用也悟真既授旨辭還師曰可速還汝當遷矣明年李不疾而逝殯七日神色如生及壙舉棺蔑如開視之從中一白錫飛去餘衣衾而已衆始悟師旨當遷者即仙也其慧悟如此一日師曳杖逍遙謂左右曰吾旦夕欲馳四方可趣治行裝已而世宗

詔求海內名師宗主天長觀事師遂幡然應詔不閱月  
戶外之屨滿矣師密削疏聚精以備儲乏既而秋旱京  
師物涌貴提點陳公者請行化畿內師曰君休矣吾已  
辨之或者疑焉不數日陸輦川舟坌集于門下衆服其  
幾沈物先德博而化時大定十四年也明年春辭還鄉  
里后四年復往趙之太清觀適境內大旱衆禱雨于師  
曰今蘊氣隆蟲願垂慈請命上帝師曰若等宜先竭誠  
徧走羣祠弗應當以吾法行之越三日不雨師乃書飛

雷掾旱符一道張淨几上復呪法水數石令州將已下  
人酌水沃符畢雨即來矣行未竟雷電雨且尺歲賴以  
熟迄今趙人能道其事廿二年興陵夢師冠履上謁寤  
思之遂徵至內殿問以攝生之道對曰噓噏精氣以清  
虛自守此野人之事今朝廷清明陛下當允執中道恭  
己無為而已聖躬為之興禮及還寵錫甚渥二十六年  
秋師忽思棲真巖壑因密謂蕭道宗曰吾門衆萬數試  
經具戒者完顏志寧王志冲而已然志冲特純精廉潔

可屬後事遂設大醮告禰廟畀之傳代秘籙曰君太一  
第三祖也及銘所付法具云有德輔德天孰可欺慎之  
敬之永保教基居無何棄几席謝去或問安所之曰吾  
將遍禮名山與心居作天遊耳遂去後不知所終師丰  
儀瀟爽德宇冲粹博學善文辭動輒數百言樂與四方  
賢士大夫游談立論道造極精妙書畫矯矯有魏晉間  
風格嘗自題畫像云來自無中來去復空中去來去總  
一般要識其間路其明達又如此生平好賑施養老卹

孤近百人人以鏹五千月給為率死乃已貧者喪不能舉衣被棺槨為俱具之至於持行法籙捕逐鬼物風聲肅肅除治戶庭間殆古之能吏然精一之誠貫達幽顯降度之功洋溢一世矣師之玄孫某以貞常溫裕為五代人天之師服膺先訓追遠盛德心藏不忘越己卯春具大招之禮葬衣冠于祖塋之側今皇帝登極之三祀光宗玄化貞常師以祖德範圍請謚于朝追贈嗣教重明真人噫道家者流其術固已多

矣而太一之法輔行世教有不可勝言者其鴻靈幽  
秘變化叵測通徹神明之功幾于上下天地把握陰  
陽者矣然苟非其人道不虛行一傳而至推廣悉備  
若真一人弘衍博文繼志述事之善者也翰林修撰  
兼國史編修官王惲狀

故金吾衛上將軍景州節度使賈公克仁行  
狀

公諱德字克仁姓賈氏景州蓚縣從教鄉劉卿里人其



系緒見學官王鼎所撰行慶碑賈氏前宋時出行管都  
團練使用威府君之後曾祖鑑志操高潔耻襲蔭不仕  
家素饒財以周急賑乏為事祖璋性勤儉專事農務故  
貲益雄鄉里父政事親孝處昆弟間無間言宗族以純  
至稱生二子長曰贊早卒次即公資秀穎在垂齠時舉  
止如成人禮既冠慷慨有遠志樂施予不屑屑拘小節  
嘗與鄉人處事談辯雄偉無出其右衆屬目異焉曰興  
賈門者必此子也自是事有疑率質成于公貞祐初燕

不能都德陵南幸汴郡盜蜂起河朔在冀部滋甚瀕洶  
囂混克焰所灼里陌為蕭條公慨嘆攏首曰大丈夫生  
世不能除暴薙亂建勲名于時掇取富貴戴履兩間寧  
無愧怍羣俊少壯其言恃其勇往往依附為用州將材  
公為且知衆素所推服自白衣署公為故城縣丞專徼  
巡事於是設方畧窮根株破機牙擒捕招諭不數月寇  
難盪平尋國兵入中夏太師國王營屯彌亘原野聲勢  
大烈震撼河岳元州將某舉城降無幾宋將李益都全

乘隙西畧甲戌歲州遂為全所得盡質官屬妻子以東  
太師聞變赫怒擁盛兵為屠城之舉公白于州將曰反  
復際明以力不支故至此况天道人事嚮背皦然詎能  
以智計免哉不早為所徇將噬臍願躬詣軍門請命遂  
間行至深州帳下太師察公忠誠慰諭殊渥許其請闔  
城賴以全活太師承制拜公定遠大將軍賜金符提控  
本州兵馬事丙戌歲太師帶孫郡王南畧晉衛明年復  
東徇魏齊皆從以行其破上黨馬武大名濟南及信安

水柵與三齊動兵關穆陵歷山下俱獲大功英威騰奕  
冠諸將列益為太師郡王所知遷鎮國上將軍節度副  
使兼右副元帥仍政佩金虎符時江陵齊東寧晉與益  
都界犬牙相入賊李蠻奴甯王簿者引海寇不時侵軼  
為百姓患公連戰破之東鄙遂安陞授金吾衛上將軍  
景州節度使歲丙申以蔣縣城東光阜城吳橋故城隸  
焉歲丙申六太子復命以分地所入江陵齊東寧晉八  
城俾公總治其事公為人恬退每物盛為戒丁未歲年

五十有二即致政閒居日課家僮輩躬瑣事澤車欵段  
優游田野間人不知為故侯宿將也至元十一年甲戌  
秋七月二十八日以疾終于劉鄉里私第之正寢享年  
八十有三公臨政剛明有斷僚友間容辭謙讓急於持  
吏惠以養民卒之畏而愛威而不猛循循然有古良吏  
風初州將以甫離搶攘人心轉側頗任刑立威所犯有  
事重而情輕者有情連而力嚇者公為折理營救多所  
昭雪以從輕議又同列馬侯子趙君妻男幼女彈壓宋

某氏者被擄胥靡營幙間公傾橐資購而良之其輕財  
重義類多此生平喪祭為尤重嘗謂宗屬曰兵荒來上  
數世殯淺土德又早失怙恃其于大葬之禮非竭力盡  
心罔極之恩何所圖報遂大治塋域表叙昭穆封植林  
丘而安而厝禮莫不備復樹豐碑紀世德以見夫祖宗  
陰積所致之厚一郡有光焉性喜修潔裘馬鮮整自少  
若素宦然稍涉書傳善左右騎射矢不虛發時輩無與  
之比公八秩時往讌從教別墅二筵起田間飛鞚回射

獲焉其精力老不少衰蓋如此夫人高氏蘇氏魏氏劉氏魏氏以賢配稱夫人梁氏施氏張氏馮氏王氏李氏亦俱有淑行如夫人者三人楊氏張氏趙氏子男一十八人曰茂宣授金虎符昭勇大將軍左翼侍衛親軍都指揮使行淮東左副都元帥府事謨勇忠謹以良將稱善射蓋家法云曰著前宣差景州管民長官曰莘未仕曰芳樺車弩千戶曰蔚未仕曰英宣差滄州節度同知性方直有從政才曰仲溫前景州課稅所長官廉能有

幹局曰毅前河間路諸軍鄂囉總管曰萍前征行千戶

曰僖曰蕙未仕曰王前征行千戶曰芝未仕曰嵩前景

州勸農提領曰彬曰仲信曰進曰璧俱未仕女一人嫡

夫人高氏所出適侍衛親軍千戶張琬男孫四十九人

茂之子奈曼武宣授金牌侍衛親軍千戶重孫一十人

兄賈子一人曰榮前景州鄂囉千戶榮之子三人重孫

二人嗚呼盛哉十四年丁丑春元帥嗣侯茂暨弟仲溫

介叅謀趙君禹卿提點李練師子玄來謁予曰先都帥



祔葬墓木已拱比年國朝方平一江左不肖忝居戎右  
思所以見諸神道者未即樹立以慰下泉霜露之愴不  
遑寧處今將託立言君子圖其不朽焉敢再拜以事狀  
為囑遂勉為次第之

故蠡州管匠提領史府君行狀

府君諱忠字良臣姓史氏蠡州博野縣孟家里人曾大  
父暨祖世在博野俱以伯仲稱父諱成繼業耕稼善因  
地利自高祖以降昆弟繁多至府君凡五世同居藹然

以孝義風一鄉君兒時日痔錢鑄為戲及長姿純厚與人交不妄言謹身節用致桑土滋植然慷慨有顧慮料事多合情得宜里人推其識直凡所疑滯必諮焉而後行貞祐初國兵入中夏蠡被圍太守持爾格嬰城自固民懍懍崩角莫知所屬欲鳥獸散公約衆合謀曰金駕而南委河朔去州又自顧不暇事勢至此吾輩將安所托正有畏天順時得全性命為計之上不然何為束手俟死衆以君素有畫可仰聽焉遂率孟莊鐵千兩河夏村

等老稚百餘人持牛酒詣太師國王行帳投附王矜其情許焉命公前慰諭者良久且給符約遣各歸田里尋州破鄰鄉多被屠掠惟孟莊兩河等里得安堵如故兵後歲饑疫公惻然興感曰家幸羸餘胡可坐視鄉人轉死溝壑即出蓋藏粟五百餘石計口而惠之賴安活者甚衆其散而復業者往往力殫具乏公為假牛畜耒耜塲種有因疾田蕪不克治者公廼侶結義社相補助於是秋穫皆有得家具酒食勞公以謝其德公曰患難相

卹人之常道奚謝為第比年來仰荷天休稍即溫飫不以禮道維持羣居雜處未免侵犯爭鬪之事衆對惟君見訓俾終厥惠君雖不經見聞遇子弟必申以孝義父兄則勉以恩愛聞順而善事者必需之飲食以蓄其良心彼游惰有安狎于不順者即畏以官府使其懲戒於是田里安集不知出喪亂之餘而有讓畔敬饁之漸每入夏設粥瀆於路以濟行人其周急濟物類如此聲稱傳播時人有義門史氏之目州總匠王公興秀賢其為

曰吾嘗聞居家理可移治于官遂薦于行省劉公署工  
匠提領府君感其見知盡心所事於是配能否均程課  
革舊弊皆有條次不紊及考工器率堅良精緻且合時  
度不為巧虛積料餘繳幹局稱入未嘗竊徒工治已私  
以自腴搃匠每稱能以勵其餘某年月日以疾終于家  
享年八十有五葬孟莊北原先塋之次識者謂公德純  
行美効官及物者甚廣其儲祥萃慶不在其身而子孫  
將有勃然興者娶同里某氏柔順勤儉克配公德生二

子長曰伯祥次曰伯福幼承訓道俱孝而友或以襲父  
職為言伯祥曰吾家世服井畝以孝弟相傳逮吾先人  
輕財重義表率一鄉雖遭罹世故所直挺挺然大先業  
為有光今予昆弟二人無所肖似繼守田廬負薪之責  
惟罔克是惕第知勤敷蓄修疆畝寒耕熱耨濬源培本  
使先世之澤淳蓄汪濊霑溉後人俟其可以起史氏者  
乃所職耳聞者嘆其志遠而有所見也及子弼長性謙  
謹寡言笑顏赫然軀幹魁偉孔武有力十六七時耕牧

田間午枕桑陰下父往饁遙睨有玄虺穴其口父大駭  
趣呼之寤問焉曰無所覺自是手力愈若神助遂精習  
挺槩又善左右騎射赳赳然負干城之氣搃匠王公子  
前潼關使彥弼異而妻焉舉於左丞相耶律公一見奇  
之得給事省府適考工上新製鐙弩力踰十鈞近臣有  
言弼材勇善挽此者即召見試有驗命列名扈從仍賜  
白金御驃以壯其勇不一二歲譯語國字皆通習之嘗  
奉旨數軍實於邊營岳祠于洛精簡而敝去壯麗而費

省由是廉幹之稱聞於朝上知其可用至元己巳命佐  
帥臣劉整南伐轉戰江漢間若鏖峨嵋揪松陽拔樊城  
下襄陽飛渡大江併圍維揚率內薄先登及論功每在  
諸將右寶鞍錦服寵賚殊渥始自漢兵總管授金虎符  
懷遠大將軍行軍萬戶加定遠安遠陞昭勇大將軍淮  
東大都督改揚州達魯噶齊今由鎮國上將軍進中奉  
大夫叅知政事行黃州路宣慰使既拜命乃謀于婦翁  
奉直曰弼自惟起身隴畝遭際風雲被沐恩遇以汗馬



微勞不十五年間仕至將相其於史氏榮之極矣茲蓋  
祖宗勤苦純儉累積攸厚一旦發越于藐焉之躬者如  
是不顯可不知其所自哉欲報之德有懇求懿筆著信  
于後者論述陰積表樹丘壠而傳不朽庶幾顯揚之道  
奉直曰宜矣遂託樞相贊皇趙公及闕使王君以事狀  
求屬因勉為次第之中奉大夫之父今年六十母夫人  
某氏若干壽皆享有全福叔之子曰輔管軍千戶次曰  
翊未仕中奉之子曰蠡奴女一人曰燕哥至元戊寅三

月晦日謹狀

太一五祖演化貞常真人行狀

師姓李氏諱居壽字伯仁道號淳然子衛之汲縣西晉里人生有淑質沉默寡言笑自幼喜道家之學年十三拜太一四代祖中和仁靖真人為師旦夕給侍左右進退應對容度詳謹中和知其可教甚善待之戊戌歲受戒為道士命典符籙科式等事籙文部帙靈章寶篆仙階顯職稱號廣博師裝繕嚴整銓次詳明大稱所委士

子歲聖主居潛邸駐蹕嶺上以安車召中和真人於衛  
既至燕見之次薦師才識明敏志行淳和請傳嗣為五  
代祖仍從誓約易姓為蕭即蒙允可賜為貞常大師仍  
授紫衣其年冬中和謝世中和人品道價高眎一世師  
嗣挈立綱以簡重堅潔持守成規洞洞屬屬若恐失墜  
及其張皇道紀醕酢事宜其應如響由是徒衆厭服聽  
約束惟謹前人之光曾不少佚時衛大旱守官致禱于  
師即書太一靈符浸巨盎中騰呪未畢雲葉膚合澍雨

霑足致德譽日廣上聞於朝己未春上南巡駐蹕淇石  
重師之請幸所居萬壽宮悵真仙之修去喜什界之得  
人周歷殿廡詢慰者久之師敷對誠款允協睿意眷顧  
光寵於焉伊始明年庚申中統建元春正月命師即本  
宮設黃籙淨醮冥薦江淮戰歿一切非命者迎奏際陰  
風淒淒若有趨赴慘泣之狀秋九月詔赴闕下上親諭  
修祈禳金籙醮筵翼日特賜號太一演化貞常真人二  
年冬上命禳斗於厚載門親詣祝香仍賚錦紋綾帔四

年秋遣近侍護師頒香燭瀆等祠仍賑濟貧乏至元三年以京師劉氏宅賜師為齋潔待問之所六年春皇嗣請師禱祀上真用介繁祉受釐之餘遂賚師金冠錦服玉佩符焉八年螟蝗為災命師即岱宗汾睢設驅屏法其秋乃大熟十年正月就上都大安閣演金籙科儀時春寒賜黑狐裘貂帽各一冬十月奉安真武神位于昭應新宮禮畢中官衣以異製綾道服大內青宮肇造之初皆詔師按太一符云襍鎮方所十一年特旨於奉先

坊創太一廣福萬壽宮中建齋壇繼太保劉果忠禪六  
十神將歲給道衆粟帛有差十五年奉旨祭七元星君  
于西府鐘室啓告之初期以風動所樹幡標為神君格  
思之驗既而儲皇親臨炷香冷颼颼至幡影颼颼從官  
劔佩鏗鏘肅然為起敬明日具陳其事上甚喜越明年  
以事辭結道壇命易七元斗位聖上儲皇以師積年祭  
禱精誠多獲靈應前後賜與如玉尊像寶粧劔安車龍  
杖金銀器皿等物不可殫紀師爰自傳嗣以來奏言始

祖曰太一一悟傳教真人二代祖曰太一嗣教重明真人三代祖曰太一體道虛寂真人四代祖曰太一中和仁靖真人焚黃昭告典禮華縟存歿有榮焉至元三年以重修祖觀殿宇告成以聞蒙勅辭臣製碑鋪敦教基具紀本末復奏受保舉師張善淵真靖大師教門提點監度師高昌齡保真崇德大師高弟李全祐觀妙大師范全定希真大師及欽承璽書護持玄門其弘闡宗教殊為光顯師以至元十七年七月二十六日羽化於西

堂方丈享年六十治命令觀妙大師李全祐嗣主法席  
訃聞上嗟悼久之儲皇賻楮冥三十定仍諭中書省給  
威儀祖送其年十月遣使護喪歸葬衛州汲縣四門村  
祖塋之次師丰儀修偉清修有操行謙虛篤實不事表  
襮混然與物無忤而胸中風鑒殊皜皜也與人交誠款  
有蘊藉所談率以忠信孝慈為行身之本未嘗露香火  
餘習生平問學不斯須離如飢渴之於飲食其易傳皇  
極三式等書皆通究其理晚節德量弘衍博大不可涯



涖宜其為聖皇挹真風屬祕祀留宿宮禁參預庭議師  
素以憂深思遠理或未暢形於顏色設因方便而需德  
澤之厯即詢訪而裨時政之闕橫覆道蔭成敷錫之美  
者多矣惟其玄默不出叵得而詳論者謂師雖方外士  
其至誠上感蓋有君臣慶會之契古人稱上士學道輔  
世主以洽好生之德師其有焉既窆之二年嗣教真人  
將以師官行請於朝植碑神門掄揚追報以慰華表歸  
來之想以不肖憚與師義同里閭交且久知師為頗詳

以事狀見託謹按綱首楊闕等所具行實勉為件右庶  
幾太史秉筆者得以採擇焉至元十九年十二月二十  
一日中議大夫治書侍御史行御史臺事王惲謹狀

秋澗集卷四十七

欽定四庫全書薈要卷一萬六千二百四集部

秋澗集卷四十八

元 王暉 撰

傳

大元故宣武將軍千戶張君家傳

君姓張氏諱思忠字正言廬龍永清人也曾祖衍大父  
德輔世業農金百年來支屬蕃息居不異爨至今以義  
門稱燕朔間父諱全安沈粹少以易闕起家為志大元  
甲子大兵南畧以良家子從軍隸都元帥史公戲下以

武幹見稱凡意料且與公契及公鎮守真定得專擢拜以功監領左軍充唐山邑事既而開府忠武公紹襲閫職首以鎮撫授君歲壬辰以千夫長從公略地河南歸德禦堅猝不易拔君鼓勇先士卒登且以戎鎧鮮異為大帥蘇卜特所識及賞犒以功讓所善高信由是信拔出行伍致身顯達遂轉戰密之西山民避兵匿洞窟中往往縱火薰逼君言諸主帥禁焉賴全活者甚衆其後從成陽夏開邊屯受戍整暇兵有餘力而民風愛懷繼

移鎮入鄧凡百草創都督史侯皆擬易治一新君依前  
以鎮撫供職於是招流散復田廬治渠堰整屯戍謹斥  
堠咸領辦有方不大聲以色人至以佛張鎮撫目之其  
慈祥為可知丙辰春壽六十有一遘疾終鄧之宜舍葬  
真定縣臨濟里域夫人趙氏後公十九年歿生子六人  
宣武君即其長也宣武幼不好弄嘗聚嬉里門能威重  
自居指顧羣兒不異官府識者已稱其不凡知學穎悟  
既不羣及長有謀畧善騎射大都督一見與語奇之命

日侍鈴下庸玉汝之幾冠嗣父職適有事江淮風雲交  
會之際宣武年少英發夙夜聽恭不遑寢餽氣益厲志  
益明事益辦時軍府有疑獄久不能決命審鞫之畧不  
加威而窮奸直枉兩造精露闔府與其明察至於繕城  
壁建樓櫓使號令精彩一軍增雄雖謀出上焉其所以  
廣益于下者多君之力也丞相忠武公奏降銀符真授  
都督府鎮撫至元五年朝廷命帥會諸道兵攻取襄樊  
為上流破竹之舉宣武備列戎行首建成白議曰消滄



勞宣授行省都鎮撫其職掌大槩上承大帥方畧指授諸將諸軍有所關白必因以上達與夫訓練調遣巡羅等事皆所領治當時諸軍大小四十餘壁每翼鎮撫一員號之曰接手日聽將令于都鎮撫武弁佩刀弭闕於雲麾之下蓋肅如也其倚重比漢軍司馬唐都虞之任君感其知過誓以捐軀報國至元十年春二月襄州破第功上聞至蒙弓矢鏐鞍繡衣之賜明年秋九月詔丞相巴延等水陸並進鄂渚渡江師次郢宋人以艤舫鬪



艦橫鎖漢面以扼之不克前責君辦之君按視對江堡  
北有枯河可三里許連接一湖湖匯於漢通君喜曰吾  
事濟矣遂挽舟由港中盡達于湖舳艫蔽江順流而東  
無復橫格之虞矣大為丞相嘉賞時主帥從偏裨百餘  
騎行視郢險天大霧不覺抵壁下彼潛出兵圍之數匝  
衆相顧失色君奮槊突擊殺數十人為解去因建言于  
相府曰郢據漢為池東南又有沙陽等城旁為犄角宜  
乘銳先破之則郢乃孤矣聽其策即命君督精甲潛往

不移蔭撤沙揚石掇新城降沔陽而去隨與諸軍併力  
破夏貴兵於陽灘堡以清江道我師飛渡駐軍武昌矣  
時朝廷策諸將始加散秩以功最授宣武將軍師既東  
前阻鄱湖風浪君力督水師浮梁而濟其敏捷赴功類  
如此宋相賈似道罄國力結陣丁家洲塞江路俟與我  
師鏖決丞相公命君督諸軍前陣君鷹揚致師出入行  
間指授方畧意甚暇也一再合而宋人敗績遂入建康  
丞相烏珠即分兵趣瓜步回擣維揚擇勇而有謀者偕

往君首膺其選丞相公偕不遣冷將策勝一軍權充萬  
夫長聞于朝其為二相倚重者若爾命未下竟以勤勞  
致疾以是年夏五月歿金陵之軍幕得年三十有九丞  
相公聞訃驚悼以馬箠擊地有云亡孰繼之嘆遣屬將  
祁祐護其轡歸張君為人美鬚髯氣量宏事親孝撫諸  
弟以愛與人交有終始不一言忘盡心所事國爾忘家  
若飢渴之於飲食其趨事赴功臨機制變志慮出人意  
表拊循士卒與同甘苦皆樂為之用故其燕趙勁氣所

向披靡樹駿功為尤多初渡江凡軍中俘士人為獻者  
君與求親屬悉資遣之其或願留依庇者事甫定一皆  
縱還鄉里夫人房氏唐相國梁公裔內助有法配君德  
良稱先君歿生子男四人長曰用道嗣君職次用和用  
康用章女四人適名族繼室史氏太尉忠武公之次女  
生女寧哥孫男四人女孫三人贊曰張氏三世在野純積  
既久故所發攸厚若父鎮撫君起隴畝奮棘荆致身為  
偏裨亦云顯矣其施若猶未也逮君遭乘機運奮發志

勇以投風雲之會惜乎功名垂就不享其報使英姿茂  
績有鬱而未盡者今嗣侯以破靖江討江西逋寇等功  
進武德將軍行軍總管風姿文雅延譽士大夫間殊藉  
藉然蓋將行大遺澤而大其世業者耶用道與內弟闕  
游交甚款以家傳見屬遂直書其事至于筆削其間以  
俟夫學春秋者焉

盧龍趙氏家傳

孟倅穆尋墜緒續先猷特懇太史王惲通述一傳庶幾

溯川流而遠紹淵源溉根本而敷榮枝葉以衰謝辭者  
再請彌堅謹按趙之得姓肇自周滿策造御勞胙土受  
氏子孫蟬螭代有聞人時邈譜逸蔑克倫次所可知者  
當唐世遠祖諱少陽生子簡亮亮生元遂宦游于燕家  
焉因為盧龍人遂生子思溫字文美姿英栗拳勇絕人  
尚氣任俠五代初燕帥劉仁恭壯其才武叙為偏將晉  
王存勗來問罪公率所部挺身遂戰日中走矢為統帥  
周德威所推晉王聞其驤勇義而釋之數蒙指蹤逮與

梁人戰於華野陷陣深入斬戮不勝計第功最加金紫  
光祿大夫檢校尚書左僕射使持節平州諸軍事平州  
刺史神冊二年為太祖遣元帥擁大兵來攻城中糧盡  
援絕公審形勢之攸歸察輿情之去就遂款附太祖素  
知其才勇可重任寵遇殊渥東伐渤海俾將全師充都  
團練使既至旬餘率敢死士十餘輩突戰先登立拔其  
城身被重傷太祖親調藥以傅之武帝即位論愼敵功  
檢校太尉保靜軍節度使天顯十一年石晉起義并門

來求援因即命公出師風憲間犄角之敬塘賴以克濟  
加特進檢校太尉中書門下平章事燕京留守盧龍軍  
節度使管內觀察處置等使明年進階開府儀同三司  
兼侍中封天水郡開國使食邑一千五百戶仍賜協謀  
靜亂翊聖功臣兼雲應朔奉聖等道採訪使時方兵後  
彫瘵未蘇政舉綱條惟從寬簡轉臨海軍節度使會同  
元年使晉行冊禮還檢校太師兼侍中進開國公加食  
邑五百戶二年春有星隕於庭俄薄疾以三月二十日



薨享年五十有八上聞震悼奠祭賻贈有加贈太師衛  
國公葵昌平縣五華山之陽敕集賢大學士張礪銘其  
神道公事親孝奉上忠出入行陣三十年大小百餘戰  
勲業烜赫身都將相備極人臣之貴而謙撝自牧退然  
若無能為者宜其以功名終初遼祖殂后述律氏智而  
忍悉召大將妻諭曰我今寡處汝等豈宜有夫復謂諸  
將曰可往從先帝于地下有過者多殺于木葉山墓隧  
中公後以事忤后使送木葉山辭不行曰親寵莫后若

何不往以子幼國疑未能也迺斷其一腕以送之直公而不殺平昔守正不屈類如此配太原王氏贈鄭國太

夫人繼室清河夫人張氏陽翟夫人翟氏子十有一人

長曰延照永清軍節度使侍衛親軍事特進檢校太尉

同政事門下平章事開國公食邑一千五百戶賜號推

忠奉節毅勇功臣

十一世孫兩山北遼東道廉訪使今居臨陵

次曰延祚燕

京留守檢校太師開國公食邑一千戶

十一世孫肱肥鄉三務使今居

燕十三世孫天民遼陽省都都事今居平灤

曰延卿竭節匡邦保義功臣大

同軍節度使檢校太師開國公食邑一千戶曰延構供  
奉官東西班都點檢曰延威推忠佐命翊贊功臣保靜  
軍節度使特進檢校太師開國公食邑一千戶

十一世孫明今

仕兩浙運司知事

曰延晞飛龍院使檢校尚書左僕射曰延誨

保靜軍馬步軍都指揮使曰延光順義軍節度使曰延  
王彰國軍節度使曰延煦點檢曰延紹同州兵馬使曰  
延旭內庫提點女十四人長適泰安州刺史傅知寶次  
適天雄軍節度使檢校太尉兼侍中韓巨美次適弘農

楊氏次適竭誠奉國翊贊功臣東平軍節度使特進檢校太師兼御史大夫上柱國南陽郡趙國公尚書令判三司使韓德樞次適榆州刺史張彥英次適彭城劉氏次適左林大將軍張美次適宣徽南院使天平軍節度使檢校太師同政事門下平章事判三司韓勣次適清河張氏次適博陵崔氏其開府太師衛國公第五子特進府君即穆之十二世祖也葬建州永霸縣白羊城有乾統七年夫人馬氏所樹銘幢特進府君生二子曰主

舜左千牛衛大將軍生子四人曰匡禹臨海軍節度使  
生八子第七子為翰仕至保遂州團練都統使始葬大  
興穴窰別墅即睿智皇后賜田也生三子相之生五子  
第三子洧生六子第二子公為嗣兼管內觀察使一子  
鎔官鎮國上將軍一子居常驃騎衛上將軍七世並襲  
遼世爵相之府君弟進之永豐庫使尚之生子公絕進  
之一子漬寧昌軍節度使贈金吾衛上將軍三子仲曰  
公謹龍虎衛上將軍靜江軍節度使四子孟曰興祥賢

而多材仕金海陵世宗兩朝以德望門地致仕遂顯赫

官至開府儀同三司左宣徽使太子少傅申國公封鉅

鹿郡王葬良鄉回城劉李里蔡家凹迄今以趙大王墳

目之翰林待制趙攄所撰神道碑在焉驃騎府君生五

子曰柄天姿孝友博學克守世範曰挺邃星歷術金初

任靈臺司正郎曰機留心軒岐書伎精良選充尙醫侍

宣宗官至保宜大夫曰梅善貨殖致屋潤積而能散貧

乏者多沾其惠興陵因游畋宿其家聞富而好禮賜銀

燭盤二鄉梓榮焉嘗監謝邛鎮酒曰植字景道穆之曾

祖也姿清淑有操行力學務為無所不窺工作詩嘗舉  
進士不偶輒拂衣去易名質隱穴寫別墅教授為業別  
墅東二里許即金建春離宮明昌間道陵春水過聞絃  
誦聲幸其齋舍諷詠門間所題詩有折脚鐺中烹白薺  
打頭屋底看青山者久之尋召至行殿賞其志趣不凡  
命之以官固辭曰臣僻性野逸志在長林豐草金鑣玉  
絡非所願樂況聖明在上容巢由為外臣可乎道陵益

奇之特賜田十頃復之終身士論烜燿自是不呼姓名  
皆曰建春徵君號其鄉曰崇讓尊顯之也終於泰和二  
年三月乙丑享年八十五配李氏生子致司正府君之  
子曰侃字和之穆之伯祖儀觀修偉學識淹貫尤長於  
音律儀制章宗時用闕閱子弟試太常禮樂科中承安  
二年登歌曰首由是於禮樂愈覃精為專門之學矣積  
勞自工師副正轉協律郎貞祐播遷禮樂散失不完命  
楊禮部雲翼馬太博千里詳定府君以掌故得預節文



所不備條理之未暢資其論說補鑄為多累官定遠大將軍大樂署直長權知太廟署事金未南遷校量鐘律獨黃鐘抑而不揚既至汴林鐘復爾雖更鑄尚然竊自嘆曰八音與政通陰陽消長所在可以卜時之治忽中興其不竟乎既而金亡嘗會飲市樓樂甫作語所知曰革有狼戾音即去之果有酗而鬪死者其沈機先識如此壬辰北渡隱居鄉里未嘗一日忘其素業迺編集郊祀所記憶者為祀典樂志辨凡三十卷或譏曰若子所

學與時豈不背戾答曰文武迭用世道之常今向平治以是備他時求訪之具聞者嘆其資深而慮遠歲戊戌襲封衍聖公孔元措薦府君於朝攝大樂丞乘傳徧歷四方搜訪前代禮官樂師祭器圖集備預制作中統建元以來文物郁然君有力焉壽八十一卒時己未夏四月二十七日也配金吾李氏一子守忠正大間策論進士仕至承德郎管勾尚書省承發司前君歿娶王氏桑氏孫五人柔原圭秀異曾孫繼祖榮祖興祖顯祖等八

人曾女孫十人玄孫男三人保宜府君之子曰璧字叔

寶穆之叔祖姿沈雄有才幹涉獵經史中武舉第官廣  
威將軍宣宗麗妃位奉事卒于戊午歲九月十九日得  
年六十五配史氏麗妃兄之女生三女俱適時族建春  
府君之子玟字文玉穆之祖也資長厚耿介不妄交游  
學問淹貫工辭翰藉門資調遵化三司使易代後僻居  
研窮理學申明家法勉子孫興門戶為務自稱貽齋居  
士壽八十五終于戊辰三月九日配良鄉李氏母儀婦

道光範中表生子鉉字仲器幼孤藉伯考定遠君翼誨  
及長雅淡喜讀書不樂仕進邃易學好古多巧思音律  
占筮咸詣其精妙太宮肇造鐘鼎祭器法物朝儀以先  
生家學精思罕匹命之監視或以方伎上聞適營建新  
都俾灼吉兆基命丕作蒙賜白金五十星重幣十襲相  
臣因欲官之辭不可止其言人榮悴雖察五行盛闕必  
配合道義廣示勤戒名公朝士歆其學識來質疑請益  
者無虛日焚香煮茗間出三代鼎彝法書圖籍傳觀披

玩論辯皆有証據及談遼金故事揮麈緩頰使聽者忘  
倦慈祥豈弟之色津津溢眉睫間有承平遺老氣象晚  
節號鈍軒逸皓諸賢贈遺詩文無慮數百篇嘗于祖窳  
側構亭為春秋奠祀所承旨王文忠公扁曰遺安樞相  
商左山為之記其為名紳稱賞若爾今年登期頤康寧  
順適壽祉未可量也娶李氏生子穆性純孝早傳家學  
善篆隸以敏慧延譽搢紳間得從事翰林出倅孟州轉  
邢臺尹超授承務中山府判官穆之子適祖述祖廸祖

導祖孫遷安於戲趙氏自五季迄今三百餘年子孫蕃  
衍幾于千人忠傳學繼世濟其美越不事宜游者學術  
行義亦昭晰於時與韓劉馬共稱為燕四大族至比唐  
李鄭崔盧由開府太師衛國公忠毅奮發捐軀為國敦  
篤大本君子之澤其流淵長亶其然乎推延威特進府  
君第五房一傳而二再傳十二人三傳至二十八人四  
傳四十五人五傳而六十四六傳八十四七傳九十二  
八傳當建春府君行羣從數幾滿百本支子侄二十有

八然遭壬辰喪亂存者僅三人而已非賴穆之訪緝譜牒則後人無由知其祖考之所自出宗系之所自分今復揚豐功之盛烈發潛德之幽光傳載無遺垂鴻不朽俾趙氏來者觀感景仰克念無忝是亦顯揚之一節也傳曰慎終追遠民德歸厚矣又曰惟孝子善繼志述事若穆也可謂有志追遠述事者也

大德己亥秋七月翰林學士中奉大夫知制誥同修國史王惲述

開府儀同三司中書左丞相忠武史公家傳

丞相史公天澤其先燕之永清人世以族茂財雄號農里著姓曾祖倫祖成珪繼有純德百年來潤涵淵寢滙而不發逮父尙書府君秉直讀書尙氣義為一方向服生三子天倪天安公其季也國朝癸酉歲冬十月太師穆呼哩以王爵帥天兵南畧中夏雷砰霆激震蕩無前府君審興運之會歸一羣疑之去就倡率義從迎降軍門王炤其誠數千人賴以生仍令府君統降主漕繼從王攻北京下之以勞授行部尙書淵流騰盛千載之會



實開于此及金將武仙以真定降王命公兄天倪充河  
北西路兵馬都元帥即鎮守俾仙貳焉時公年二十有  
三身長八尺音吐鐘鉉然善騎射拳勇絕人屬橐鞬署  
帳前總校明年乙酉春護母夫人北歸仙尋叛都帥遇  
害府僚王縉王守道追公及燕曰變起倉猝部曲散走  
多在近郊即回旆當不招自至公毅然曰不聚國之讎  
死亦當往遂傾橐易伏南還以圖報復行次滿城得士  
馬甚衆餘兵四集牙將毛闕等即推公攝行軍事遣監

軍李伯祐言狀于王就請兵濟討即命公紹兄職仍以國將錫納噶統精兵三千為援合勢進攻盧奴仙驍將葛鐵搶入主薄擁萬衆來捄公撤圍逆之奮先將士灑血馳戰呼聲震地無不一當十葛氣褫會日暮退依派水為阻公料其情歸敵必宵遁果然乘之衆大潰生擒鐵搶資其器仗儲侍軍威大振遂下中山略無極拔趙丹進駐野頭仙懼奔西山之抱犢砦其年夏六月復真定無幾宋將彭義斌陰與仙合又圖竊取公同國將禦

諸贊皇扼仙軍不得進義武勢蹙嬰火炎山自固主帥

問計於公曰賊衆山厄自陷圯地此易破也遂令監軍

孫闕提銳卒五千公略其後繼以鐵騎蹂之斬義武戲

下自是義勇之名軒襍燕趙間後數月仙潛納諜者匿

大歷寺夜斬闕為內應遂反其城公跳走藁守帥董俊

以全軍授公復與錫納嚙破走仙主帥忿民之反覆驅

萬人出將勦焉以示威公曰楚皆吾軍民我力不能及

一旦委去不幸為賊脅制今殺之何罪弗聽復力爭良

久乃悟而全釋公乃繕城壁除武備明號令守禦以方  
為不可犯之計歲荒食艱捐甘苦與衆共之於是招流  
散拊瘡疾披荆榛掇瓦礫數年間官府及民聚以次完  
治然高公抱犢諸柵仙之巢穴也不即翦覆則終遺後  
患隨攻下之仙鼠竄而去繼又取相衛太宗即位公入  
覲朝議方選三大帥分統漢地兵上素聞公賢詔為左  
路萬戶以真定河間大名東平濟南隸焉庚寅冬圍武  
仙於汲小大凡十餘壁金將合達以衆十萬來援鋒始

交不利諸將乘虛一時奔北公獨以千人繞出敵後挺  
刃橫擊敗一都尉軍既而復與大軍合攻仙逸去復取  
衛州明年壬辰太宗由白波渡河詔公以兵由盟津會  
河南至則睿宗皇帝已破合達軍于三峰山乃命公略  
地京東遂招降太康柘縣瓦岡睢州追殺守帥慶山奴  
於楊邑金主東播復自黃龍岡來襲我新衛公聞之輕  
騎馳赴比至已合圍奮戈突抵城下呼守者韓帥曰汝  
等勉力援兵繼來復躍出敵愕眙為披靡明日大軍至

內外夾擊敗走蒲城公尾其後金將博碩所將兵尙八萬我殺掠殆盡金主以單舸東保歸德公與偕軍會睢陽同僚薩奇蘇欲薄城背水而營公曰若敵來犯我進退失據此豈駐兵地耶公爭不下以其事赴汴比還全軍皆沒其圍蔡也當懸瓠北面潛涉汝險出入壘中血戰者連日蔡兵大衄汝水為不流金亡公還趙視師自乙未版籍後政煩賦重急於星火以民蕭條卒不易辦有司貸賈胡子錢代輸積累倍稱謂之羊羔利歲月稍

集驗籍來徵民至賣田業鬻妻子有不能給者時兵民未分賦役互重複遇征戍則趨辦一時中外騷屑殆不聊生公憫詣闕併奏其事民債官為代償一本息而止軍則中戶充籍其征賦差貧富為定額上皆從之布告諸路永為定制迨戊戌己亥間仍歲蝗旱復假貸以足貢數積銀至萬三千餘錠公度民不可重困乃先出其家貲次及族屬官吏均配以償遂折其券監郡孟克薩勒以國兵鄂囉數萬騎散處州郡間營帳所在大致驛

騷伐桑蹂稼生意悴然公騰奏太后悉徙居嶺北由是  
軍民肩息田里遂有生之樂迄今真定兵甲民數勝於  
他郡由公牧養其根本故也國朝自金亡以來歲有事  
於宋公未嘗不在戎行棗陽之役城小而堅主帥忿其  
攻久不拔命徑乘其城公率馮程二巴圖爾

國朝語謂勇猛  
士曰巴圖爾

先諸將登太子科綽壯其勇惜其材傳呼止之公戰愈  
力克焉其攻襄陽也宋以舟師數千陳峭石灘犄角以  
綴我肘太子以城不易拔可趣利舟楫命公往以陳翟



二校自翼驅猛士兩舸直前擣之彼氣既奪奪槩盡決  
覆溺者萬計獲焉及取光化復列絙首上立陷其城復  
州之役敵盛以鬪艦三千艘鎖湖面為柵公進說曰柵  
破則復當自潰遂募勇敢士四十輩親鼓而前壞蕩無  
遺復懼而降其攻壽春也公獨當一面宋人以我圍遠  
勢分緩急首尾莫應賊乘夜果來斫營公單騎逆戰手  
格殺數人戲下繼至悉驅賊入淮水至于掀滁州蹂盱  
眙掇寶應瀕江渚且破且降者二十餘所雖會諸道兵

共事其伐謀制勝愾敵樹功未嘗不在羣帥之右及策

勲盟府推讓行間雖寸長不掩故諸將曲盡其智能士

卒樂出死力論者謂公智信仁勇堂堂有古良將風士

予歲公入覲憲宗察其忠勤特加顯異遂以衛五城封

公為封邑方今聖上闕闕潛極知河南困敝請分治培植

為異日包舉殘闕之本許焉遂以公充經畧使公以河

外虛耗日久封豕薦食于內邊寇日侵於外非大興振

濯則不可去之舉賢能汰冗濫抑豪強均賦役信賞明

罰訓農勸兵列堡戍以絕寇衝實屯廩以結邊餉凡政  
之不便及民所欲而未得者率更張而立行之睢州長  
楊興封丘簿董闕極橫恣不法暴其惡肆諸市萬口稱  
快明日間閭間有畫公像者不二三年方數千里之間  
行於野民安其樂旅出於塗商免其露處觀善俗則既  
庶而有教察軍志則又知夫怯私鬪而勇公戰威行惠  
布陽開陰肅內外修治略無遺策河流遠潤衛亦復承  
平之舊宋人為榮其北門矣丁巳春詔左丞相阿藍哥

兒勾較諸路財賦性苛刻鍛鍊羅織轉功為罪上下例  
遭凌辱公以勲舊獨見容假公請曰經略事我實主治  
是非功過理當我責今舍焉而罪餘人心何能安怒叱  
去公不為動堅請者數四用是翼蔽頓釋者甚衆戊午  
秋扈憲宗西征明年夏駐合州之釣魚山秋疫作方議  
回鑾宋將呂文德率艨艟千餘蔽嘉陵江來犯逆戰不  
利上命公禦之乃分軍為兩翼跨江列陣文德軍至截  
流縱擊斃鉅艦數百艘追至重慶三戰三捷遂班師而

還又明年庚申夏六月是為中統元年皇帝御極首問  
公治國安民之道遂具疏以聞皆時所急務上嘉納之  
旋命公撤江上軍還授河南等路宣撫使兼江淮諸翼  
軍馬經畧使制辭有史天澤自太祖皇帝命穆花里國  
王開拓漢地卿兄有佐命殊勲又扈從朕之父兄勤勞  
王事文經武畧於國有功綏撫河南民懷惠愛有功高  
心小夷險不移之旨明年夏五月由江淮經畧使進拜  
中書右丞相公既秉鈞衡細大之務知無不為然言必

慮其所終行必稽其所敝不强時之不能不禁民之必  
犯體時順勢通變制宜於是清中書以正紀綱分六部  
以綜名實設撫司以肅州郡退貪殘以簡賢能需恩澤  
以安反側頒祿秩以養廉節禁賄賂以絕倖門又定省  
規十條董正其機務憲宗初年括戶餘百萬至是諸色  
占役者强半悉奏還為民籍以紓疲瘵論思之際處國  
相儒臣間調諧彌縫必使情通理得期於事集功成澤  
被生民而已自是上下交孚帝載熙緝中書無留務矣

故中統初元文物休明階太平之治者公之力為居多  
秋九月扈從北征次錫默上與阿里克布克遇命錫津為  
右軍公為左軍仍合大勢蹙之北兵潰遁三年春壇賊  
陰結宋人以益都叛上命親王合必赤摠兵討之亮勢  
張甚詔公往視聞壇入據濟南公曰狶突入豈無能為  
也至則進說於王曰壇多譎而兵練不宜力角當以歲  
月斃之遂環以深溝高壘奔軼應援之計畧不能肆四  
月軍潰出降生擒壇公力主斬於軍門誅同惡者數十

餘人悉縱歸傳檄東下為壇守者皆降及陞見悉歸功  
諸將乃以擅殺自劾上察公忠誠亦不之罪初臨軒授  
鉞付公顯征諸將皆聽節制迨卒事未嘗以詔旨示人  
三齊平首奏兵民之權不可併居一門行之請自臣家  
始史氏子弟即日皆解紱而退初公既相即辭其封邑  
凡三請乃許其謙遜密勿類如此至元改元加光祿大  
夫中書右丞相如故三年皇太子燕王頌中書兼判樞  
密院以公為左丞相樞密副使遂議建三衛及留兵寓



農之策不二三年國容軍實蔚然可觀六年朝廷營取  
襄漢詔公與駙馬呼喇珠往經畫之賜金駱甚渥至則  
相要害起一字城聯亘諸堡貯兵儲絕聲援示以久駐  
必取之基而繼以疾還明年進開府儀同三司平章軍  
國重事仍令右丞相安童諭旨曰中書省尙書省樞密  
院御史臺或一月或浹旬大事卿可商議小事不煩卿  
也十年宋將呂文煥以襄陽內附聖天子赫然有掃清  
六合混一車書之意明年秋與右丞相巴延總大軍行

臺荆湖自襄州水陸並進趣鄂渚渡江中道病不能進  
上聞遣使賜葡萄酒勞公仍慰諭曰卿自朕祖宗以來  
躬擐甲冑跋履山川宣力者多矣又卿首事南伐異日  
功成皆卿力也勿以小疾阻行便為憂勞可且北歸善  
自調護公還真定上又遣其子杠與尚醫馳視及賜參  
糖等物因附奏曰臣大限有終死不足惜第請天兵渡  
江以殺掠為戒言訖而薨畧不及其家事年七十有四訃  
聞上深震悼遣近侍致奠賻白金若干贈太尉謚曰忠

武仍勅辭臣製碑表其勲德公忠亮有大節出入將相  
近五十年其元勲碩德柱石四朝師表百辟殆古社稷  
臣而氣貌循循若無所為者及臨大事論大政夷大難  
毅然以天下之重自任要以竭忠徇國尊主庇民為心  
一以至誠將之其視富貴權勢歛然畏遠若將有浼於  
己者其善始令終世擬之郭汾陽而氣量涵宏識慮明  
哲又根於天性粹然故累朝賞公忠勤龍光稠疊前後  
賜齎不可殫紀公初進大拜制下之日朝野交慶公門

閤蕭然若無所事有面說公以威權自張者公因舉唐周墀為相問於韋澳曰力小任重何以能濟澳曰願相公無權墀愕然不知所謂澳曰爵祿刑賞與天下共之何權之有又曰某緣汗馬頗著微勞餘將何有今眷倚如此正以軍國事體猥多歷練老夫有通譯其間為諸公調達耳相則吾何敢當言者悚服而退至於開誠心布公道集衆思廣忠益用人齊家訓教子侄又有大過人者當歸德城潰脫李大節于白必俾留叅幕謀務無

巨細一以委之參卿王昌齡代公治衛亦以聽其注措  
其裨贊籌畫則王守道納合松年四人推誠委寄雖骨  
肉莫能間故真定治效高視他郡四方為之訓北渡後  
名士多流寓失所知公好賢樂善偕來游依若王濬南  
元遺山李敬齋白樞判曹南湖劉房山段繼昌徒單顥  
軒為料其生理賓禮甚厚暇則與之講究經史推明治  
道其張頤齋陳之綱楊西庵張條山孫議事擢府薦達  
至光顯云初武仙既害都帥公紹其職及兒子楫長即

奏牘於朝曰臣始遭家難黽勉承乏以雪讎恥今任楫等皆可勝任愿以職歸之畢臣宿志太宗曰但聞爭官者多讓職者鮮卿之此舉殊可嘉尙朕自有官俾之即詔楫為真定路兵馬都總管後又奏次侄權充唐鄧軍萬戶公因以疾乞退曰臣無大功報國一家處三要職恩寵踰等敢昧死固請上曰卿奕世忠勤有勞于國一門三職何愧何嫌竟不允憲宗駐六盤也詔發民為兵勅使擬公子為帥公曰吾昆弟三人大兄之子俱顯仲

之子未也幸先之使者嘆服竟以侄子樞充新軍萬戶  
初總衛釣魚也有邊將蒲察琚者隸焉日有言偃蹇不  
為愜公含容之明年渾都海平行臺上功相府獨琚名  
闕公問焉或以前事對公曰聞平夷隴右若功最多其  
可後哉即命具完文以進遂均賞賚其忘過記功又如  
此嘗集子侄輩戒之曰史氏起龍幹際風雲德涼效薄  
今身名顯赫宗族昌熾如是何以答乾坤大造累朝之  
恩私乎若以王事歿邊襄馬革歸葬吾素願也汝等異

時策名委質盡忠所事以圖報國又曰惟孝與義可有  
立于代汝等謹服此訓苟違吾言與暴吾丘墓等爾公  
年四十始折節讀書酷嗜資治通鑑真積力久義精理  
貫諷誦略皆上口至成敗是非往往立論出人意表雖  
老師宿儒有不如詳者至矢謀廟堂運籌戎幄良法美  
意契合融會見諸行事者誠無愧于古人云八子格中  
書右丞樟前新軍萬戶棟中山知府杠提刑按察使杞  
前衛輝路總管梓澧州路同知楷終南陽府同知彬御



史中丞孫男一十六人不肖憚猥登公門者有年及與  
諸子游故聞公言行頗詳以家傳屬筆故勉為撰述異  
時太史氏勒元勲於帝籍贊畫像於凌烟庶幾有所考  
焉贊曰忠武公當草昧患難之際憤發義勇收合散亡  
卒之芟羣雄定河朔開國承家光昭父兄遺業其功烈  
已不世出然一時佐命儷景同翻者多矣唯公歷事四  
朝恩遇眷倚始終不少衰復能斂百戰之威雍容廊廟  
以道事君為時賢相高名完節爛然獨著福祿永終慶


流後裔豈偶然哉蓋由勲德兼備忠智兩全君臣之間有以感召故也若祇以遭際期運依乘風雲論之是豈真知公者哉故推其生平行已大節為後來之法云

秋澗集卷四十八

謹按卷四十七第十五頁後一行鄂囉舊作奧魯今改後  
倣此 後五行奈曼岱舊作乃滿歹今改 十六頁後  
四行特爾格舊作鉄哥今改後倣此 十九頁後六行  
達嚕噶齊舊作達魯花赤今改後倣此

卷四十八第一頁後五行蘇卜特舊作速不解今改後倣  
此 四頁後八行烏珠舊作阿求今改後倣此 十五  
頁後五行穆呼哩舊作木花里今改 十六頁後二行  
錫納噶舊作笑乃旱今改 十八頁後一行博碩舊作

伯撒今改 後三行薩奇蘇舊作撒吉思今改 十九  
頁前七行孟克薩勒舊作忙哥撒兒今改 後五行巴  
圖爾舊作拔都今改後倣此 後六行科綽舊作濶出  
今改 二十二頁前四行穆花里舊作木花里今改  
二十三頁前二行錫默舊作昔木又阿里克布克舊作  
阿里不哥又錫津舊作線真今並改 二十四頁前二行  
呼喇珠舊作忽刺出今改



總校官進士臣胡榮  
 校對官學正臣卜惟吉  
 謄錄監生臣張同履

財團  
 法人  
 佛陀教育基金會  
 釋淨空  
 敬贈

